

適園叢書

張宗祥



通國書香

吳昌碩



重刊湖海新聞夷堅續志後集卷二

澄江河東思善堂

佛教門

佛像

盧六祖

八十三

盧六祖名能廣東新州人學佛見曹溪水鄉遂於其地擇一
道場求之地主但云只得一袈裟地足矣地主從之遂以袈
裟鋪設方圓八十里今南華山六祖道場是也從坐化自唐
宣宗時至今六百年肉身俱存香煙薰其面如漆元至元丙
子年漢軍以利刃鑽其腹見心肝如生人遂不敢犯衣鉢盡
載之過北今已發回有金宣宗御賜袈裟織成淡山水呂左

承以織金段蔭之有西天鉢非銅鐵非木石有西天履非革
非木竟不知何物有貝葉經十六七葉有佛西以小銀合載
之元有一孽龍據深潭爲人害六祖曰只怕你變小不怕你
變大其龍果變小遂以鉢盂載之在寺中乾枯歸附後惜其
龍不存

蜀中聖僧 八十四

蜀中最大之山惟稱岷峨岷者青城山也乃張天師顯化之
地中有三宮九觀有大面山高九千餘丈四時常有雪下六
時水投筆增鬼市鬼城鬼障與鬼誓日月盤天地盤白龍洞
黃家洞木葉符多有聖蹟不可名該峨嵋山者高七千餘丈
上與天齊詩云不知山太高多少只見星生在下頭有黑水

寺白水寺山嶺有望佛閣四月一日開寺門六月一日覩佛者上山先觀羅漢見次觀普建見次觀普賢見人人上山所覩不同至七月一日寒甚不可居下山有請佛鳥先叫然後諸佛見聖僧者有一人入山采柴深入無路可出忽見大木爛朽半邊有一僧坐於內而指嘴纏身三匝後山中申官官差山扛至嘉定府中再三叫之方醒開眼云我是廬山慧遠禪師之弟謂之惠可我深入山坐於木下不知今爲何代言畢遂不復言亦不食不起至今聖像留白水寺

觀音靈驗

入十五

杭州天竺寺乃石晉天福閒僧道翊夜見山閒光明往視乃一片奇木命匠刻成觀音像偶一僧從洛陽持古佛舍利來

加之頂閒妙相俱足水旱災傷祈禱靈驗身披瓔珞皆宋朝
御賜七寶爲之五色璀璨實爲希世之寶杭州歸附後謂七
寶纓絡夜有神光爲異拘取之以貢朝廷至京則晦而不明
乃祝之曰如七寶纓絡欲回天竺期以某時色再光明至期
果神光燭天遂遣回天竺

石山巨佛

八十六

唐憲宗韋皋爲四川節度使奉詔命於嘉州對岸大石山中
鑿一巨佛高百餘丈面闊十餘丈兩耳二井可以汲水供廚
起九層樓以蓋覆之謂之九頂寺夜夜有聖鐙自峨嵋山來
朝遠望皆見又有功德於蜀蜀民思之家家供祀後來朝廷
封爲南康郡王四川都土地至今血食焉

佛化

羅漢降生 八十七

良齋謝諤字昌國官至尙書後以臨江開國致政天下皆與
覓碑額字眞銀鈎鐵畫也至大金國出千金以購其字而不
可得一日有江湖士人哀告求覓劉國大銷金鋪六字公憐
而書之中脫套大金國字朝廷詰問大費分析其恭人擊碎
所用墨池云老矣何必苦此筋骨公復以破墨池再寫卻與
夫人云人在門前等守此字送人便可得五七千或十數千
糴米供家我何可憚勞其厚德如此蓋公生時其父夢居近
僧寺第七位羅漢臨房卽誕而寺僧先一夕亦夢第七位羅
漢辭去謝宅公將死時繼寺僧人夢羅漢歸因知公乃佛會

中人故富貴壽考尋常不同

金剛負擔 八十八

饒州妙果寺聚僧眾百餘人內有一風和尚終日飲酒啖肉
夜則止宿於山門下醉中屢毀長老并數其過失每夜至更
闌方已長老雖怒久欲逐之卻畏其言無忌憚恐揚醜於外
姑且忍之一日風僧於五更初升堂擊鼓大眾驚起畢至乃
知其求去覓擔夫出外雲遊長老大怒叱風僧曰門前有二
金剛汝可將取一箇去風僧高聲對云謹領法旨而退至夜
半後醉罵長老卻用繩穿一擔以梯挂於肩上眾僧見之莫
不掩口而笑風僧醉臥如前次日五更初叱起金剛曰可負
擔隨行天明門子入寺報云風和尚與左畔金剛負擔者皆

不見了長老令僧眾叫喚本處居民各執杖棒呼噪遏住風僧回首與金剛取擔自負乘雲而去惟金剛立於田中里人因起殿屋數楹以蓋之後又有增修者卽今爲金剛寺所謂風僧者乃羅漢顯化也

觀音化手

八十九

宋咸淳癸酉六月二十七夜江陰軍城中有李其姓者好善夜夢一白衣道人來告曰覓一隻手李曰他物可與手無與乎道人曰有城中王長者家有白檀五尺可作吾手李急訪問到王家以實告王曰果有之今事屬神明請一半錢奉施一半李得此香徧尋神像乃在城東北君山下小石江邊有一神左手提鐘無右手立於水津一見如夢中人也遂命匠

整頓是名立地觀音因此每年六月二十八日作會俗以爲生日非也

觀音現身 九十

蜀中年例以二月八日佛入涅槃其兩州作無礙大齋三晝夜善緣士女自遠方來觀者無數作採拈會宋淳祐甲辰二月九日有遠方一僧水下坐化去眾以竹椅扛赴柴樓火厝數十僧皆誦經觀看有依政縣鐵匠姓李攜妻與二子同來於眾中高聲云一日過一日一日無所益早往西方去般若波羅密徑跳火中立身大火燎之但見一白衣觀音身燒著大眾莫不嗟嘆遂與僧同骨灰立塔於燒處祈禱有應

七真僧

九十一

七眞僧眞身在南雄報本禪寺乃唐朝六祖同時趕五祖衣鉢僧也內有一僧虛空坐化於寺前井中一僧專喫豬頭手弄頭錢名爲豬頭和尚坐化歲旱郡守禱雨迎於郡前頭髮自生相去六百年其靈感如此

小釋迦

九十二

袁州仰山小釋迦南雄州小溪村中人姓黎學釋教出外得道一日回鄉其母以肉啗之黎曰不喫則違母命於是食之遂以刃刳其肚腸在小溪水邊洗濯有村嫗稱其小名罵之黎口占四句曰得道莫歸鄉歸鄉道不行江邊老婆子喚我小時名於是徑往袁州建道場至今靈驗每歲南雄鄉人上山朝仰則先一夜錫杖自鳴寺僧知小釋迦鄉人至矣

身外有身 九十三

慈雲長老姓王始名道待試南宮病起強遊西池一僧延入
茅屋似無煙爨惟一巨甕破笠覆之私念必積穀其中試舉
其笠甕中明朗樓臺高下人物往來有人呼道名姓隨聲已
在其中有宰相李輔國召道爲門賓以女妻之是年秋賦魁
選繼爲御史時后征北狄道上奏云攻夷狄如以明珠彈雀
雖得雀亦亡珠矣得彼地猶石田不可耕也古人謂禦戎無
上策未爲正論臣以忠信結之爲上策擇將守邊爲次策以
兵伏之爲中策以女妻之爲下策玉帛結之爲無策帝喜其
奏詔授中丞俄而拜相盡弼諧之理天子廢后而立馬妃道
極諫帝怒貶瓊州司馬全臺諫臣論其忠復拜相又興兵征

遼道上奏甚鯁帝震怒斬道東市刃及頸乃覺身坐甕旁再拜僧曰富貴通塞命也此天之所有性命心氣內也此身之所有吾將順乎天而養乎內僧曰是矣送道出門僧與寺俱不見道乃削髮披緇居大慈寺禪功精進將去世作詩曰來自無中來去自無中去總是恁地去莫要錯卻路遂兀坐而化

伽藍護法 九十四

宋徽宗崇道教林靈素上言改佛刹爲道觀僧曰德士行德童崇明寺德士彥深無聊出寓本村橋寮寺有五通護法極靈道士寢食不安乃仗劍出水繞寺行法曰汝有神通若能倒行予於汝服神忽於佛殿檐板之下現身倒行數步皆黃

泥腳迹長可尺半五指儼然道士告林靈素仍命彥深居住
時二百餘年腳迹未泯鄉人今以北宮稱之

鸚哥顯聖

九十五

江陵府某好善常持誦觀音經至元壬午冬與眾相約欲過
往他郡未行閒忽見門外有一鸚鵡作聲喚曰莫要去莫要
去似有再三叮嚀之意其人省悟莫是觀音臺上箇顯靈報
我遂不敢行他人不信而往者中途遇盜盡被劫殺獨此人
獲免

聖僧

僧圓澤

九十六

洛陽李源隱居山谷嘗與惠林寺僧圓澤善相約遊峨嵋山

圓澤欲取路斜谷李源強由泝峽舟次南浦見婦人錦襜負
甕而汲者圓澤望而泣曰吾不欲由此者爲是也李源驚問
之圓澤指曰婦人姓王氏吾當爲其子懷孕以待三歲矣吾
不來故不得乳今旣見無可避者三日浴兒願公臨我一笑
爲期後十二年杭州天竺寺外約與公相見至暮圓澤無疾
逝而此婦果有一子踰三日李源往視兒見果笑源後十二
年赴其約聞葛洪川畔有牧童扣牛角歌曰三生石上舊精
魂賞月吟風不要論慚媿情人遠相訪此生雖異性長存及
相見曰李公眞信士也又歌曰身前身後事茫茫欲話因緣
恐斷腸吳越山川尋已徧卻回煙棹上瞿塘遂去不知所之
觀此一事則知佛性一點靈犀亘古不壞萬劫千生生身雖

異而此性長存也

婁道者 九十七

宋眞宗朝承天寺婁道者有智慧能逆知吉凶宋眞宗嘗召入禁中時欲立章獻意未決命嬪妃出見師闕云凡二百餘人皆不語至章獻挽之曰陛下可善遇此人能爲陛下主家計上奇之意遂定及章獻垂簾又召至錫賚不貲復歸有新知軍入境惟不喜道者遂告其徒曰緣盡當滅知軍疑其詐死命焚之凡三日衣被不動其徒禱曰師不違眾惡不若聽其火厝忽雷雨驟作流水滿庭薪火皆滅口出白煙自焚立盡而獨留目精與舍利不壞舍利無數邦人葬其骨淮岸舍利等物藏塔下至今淮水漲溢至塔卽止後賜塔額許歲度

兩僧

僧法華 九十八

宋仁宗朝有僧法華者莫知其所從來相傳言誦法華經故以爲名至元三年仁宗不豫國嗣未立天下寒心諫官范鎮首發大義乞擇宗室之賢者使攝儲貳以待皇嗣之生退居滿服典宿衛尹京邑以係天下之望并州通判司馬光亦以爲然凡三上疏一留內二付中書上夜焚香默禱曰翌日化成殿具齋虔請法華大士俯臨毋卻清旦上道衣凝立以待俄馳奏言法華自右掖門徑趨將至寢殿侍衛呵止不可上笑曰朕請而來也有頃至輒升御榻踟躕而坐受供訖將去上曰朕以儲嗣未立大臣咸以爲言駿尋晚暮嗣息無有法